



13. juni 2016

Inatsisartut Suleriaasianni § 37 naapertorlugu Naalakkersuisunut apeqqutit imaattut matumuuna saqqummiuppakka:

**Naalakkersuisunut apeqqutit tuttunik aavarneq pillugu:**

- 1. Naalakkersuisut aqutsinikkut anguniagaat suppat tutut eqqarsaatigalugit?**
- 2. Nuummi pinialuttartut aavarnissaanni killilersuinissatut siunnersuuteqarneq ilisimatuussutsikkut imaluunniit politikikkut soqutigisanik pissuteqarpa?**
- 3. Killilersuinissaq ilisimatuussutsikkut soqutigisanik tunngaveqarpat kissaatigaara paasissallugu ilisimatuussutsikkut nakunaarutit aamma tusarniaanermut atatillugu akissutit suut tunngavilersuutinut ikorfartuutaasimanersut.**
- 4. Naalakkersuisut kalaallip naligninnaap neqinik imminut pilersorsinnaatitaanera piniartut pisaminnik iluanaarniuteqarusunnerannut naleqqiullugu qanoq isumaqarfigaat?**
- 5. Soorunami Nuummi pinialuttartut kisimik killilersuivigineqarniartut. Assersuutigalugu pinialuttartuq Nuummiu Sisimiunukarluni killeqanngitsumik tuttunniarsinnaava?**  
(Inatsisartunut ilaasortaq Michael Rosing, Demokraatit)

### **Tunngavilersuut**

Naalakkersuisut tuttoqassuseq eqqarsaatigalugu kissaataat paasissaanngillat. Kalaallit naligninnaat ataavartumik pisaqarluartarnissaat kissaatigineqarpa imaluunniit ikittuinnaat pisaminnik iluanaarniuteqarusuttut iluaquserusunneqarpat.

Naalakkersuisut tusarniaanermut atatillugu pilersaarumminnik saqqummiussipput oqarlutik Nuummiut pinialuttartut killilersuivigineqassasut 2016-mi ukiakkut aavarnermi taamaallaat tuttunik tallimaraarsinnaatitaassallutik. Tamanna ilisimatuut innersuussutaannut akerliuvoq, ilisimatuut kissaatigimmassuk tutut naleqquttumik amerlassuseqarnissaat, tutut amerlivallaarpata uumasut nerisaqarniarnerat innarlerneqartussaammat.

Tusarniaanermut atatillugu akissummi 2015-meersumi Pinngortitaleriffik allappoq maannakkut tutut amerlassusaat amerliartornerisalu takutikkaat killeqanngitsumik ukiakkut aavartoqarsinnaasoq paarlattuanilli ukiukku aavarneq tuttunut sunniuteqarnerlunnerusarpoq pisarinqartut amerlassusaannut naleqqiullugu pissutigalugu akornusersuinernit kulavaat puullaqeruloortinneqartarmata piffissami eqqissisimaarusuffianni. Taamaattumik allaanngilaq Naalakkersuisut piaraalutik ilisimatuut innersuussutaat tusaanngitsuusaarsimagaat.



Ilisimatuut innersuussinerat naapertorlugu ukiakkut ikinnerusunik pisassiinerup ukiukkullu aavarnerup kingunerissavaa norrisartut ikinnerunissaat tamatumalu kingunereqqissavaa neqinik annikinnermik pissarsisoqarnissaa naak aqutsilluarnerunikkut neqi annertuneq pissarsiarineqarsinnaasussaagaluartoq. Malunnarpoq ilisimatuut innersuussutaat tusaanagu politikkikkut soqutigisat siunnersuummi tunngaviusimasut.

Apeqqutit akeqquneqarput ullut suliffiit naliginnaasut qulit iluanni.